



N° 4205
Reçue le 04.05.2021
Déclarée recevable
Président de la Chambre des Députés
(s.) Fernand Etgen
Luxembourg, le 04.05.2021

Här Fernand Etgen
President vun der Chamber

Lëtzebuerg, den 3. Mee 2021

Här President,

Esou wéi den Artikel 83 vum Chambersreglement et virgesäit, bieden ech Iech, dës parlamentaresch Fro un den Här Mobilitéitsminister an un den Här Educatiounsminister weiderzeleeden.

Vum 9. Mee 2021 un trieden eng Rei nei Buslinnen am Kader vun der Reorganisatioun vum regionale Busreseau RGTR a Kraaft. Am Norde vum Land hunn déi Ännerungen deelweis negativ Auswierkungen op de Schoulwee vun de Jugendlechen, déi mam Bus an d'Schoul fueren – ze gesinn um Beispill vun de Linnen 627 respektiv 622 fir an de Lycée du Nord zu Wolz.

Schüler vu **Léifreg** (Liefrange) hu bis elo zum Beispill moies um 7.25 Auer d'Linn 620 geholl a si laut Fuerplang um 7.41 Auer am **Lycée du Nord zu Wolz** ukomm. Well dës Linn vum 9. Mee un net méi iwwee Léifreg fiert, mussen d'Schüler vun dann un d'Linn 627 huelen. **Fir moies an de Lycée du Nord ze fueren, musse si de Bus um 6.54 Auer huelen am komme schon um 7.22 Auer beim Lycée un**, well deen nächste Bus fiert eréischt eng Stonn méi spéit. De Fuerplang fir den Heemwee ass ebenfalls zum Nodeel vun de Schüler : Mat der Linn 620 si se um 12.05 respektiv 16.15 Auer zu Wolz an de Bus geklomm, mat der neier Linn 627 fiert hire Bus eréischt um 12.34 respektiv um 16.34 Auer.

Schüler vun **Eeschpelt** (Tarchamps) hu bis ewell zum Beispill moies um 7.23 Auer d'Linn 622 geholl a si laut Fuerplang um 7.43 Auer am **Lycée du Nord zu Wolz** ukomm. Fir heem ass hire Bus um 12.08 respektiv um 16.08 Auer gefuer. Mam neie Fuerplang fiert d'Linn 622 vum 9. Mee un eréischt um 7.36 Auer zu Eeschpelt fort, an **d'Schüler komme laut Fuerplang eréischt um 8.00 Auer am Lycée du Nord zu Wolz un, d'Schoul fänkt awer schon um 7.55 Auer un**. Och um Heemwee ass den neie Fuerplang hei zum Nodeel vun de Schüler : Wa se bis ewell de Bus um 12.08 respektiv 16.08 Auer beim Lycée du Nord konnten huelen, mussen se an Zukunft do bis 12.50 respektiv 16.50 Auer op hire Bus waarden.

Am Kader vun dëse Changementer wéilt ech folgend Froen un den Här Mobilitéitsminister an un den Här Educatiounsminister stellen :

- Wéi erklären déi Häre Ministere sech, dass déi nei Fuerpläng net méi op den Horaire vum Lycée du Nord zu Wolz – deen an dësen zwee Fäll an der sougenannter „Zone de proximité“ läit - ofgestëmmt sinn an dass fir d'Schüler doduerch onnéideg „Temps morts“ entstinn ?
- A wéi engem Mooss gëtt assuréiert, dass d'Schüler während den „Temps morts“, während deene si an Zukunft musse beim Lycée op den Ufank vum Unterrecht oder op de Bus fir heem waarden, net sech selwer iwweerlooss sinn? Wéi ass d'Responsabilitéitsfro geregelt, am Fall wou de Schüler eppes géif virkommen?
- Wëssend, dass den Unterrecht um 7.55 Auer ufänkt, wéi ginn déi Häre Ministere mat der Situatioun ëm, dass déi Schüler, deenen hire Bus laut Fuerplang eréischt um 8.00 Auer soll

beim Lycée du Nord zu Wolz ukommen, all Dag ze spéit wäerten an hirem Klassesall sinn?
Wéi eng Consignen gi fir dëse Fall un d'Direktioun vum Lycée du Nord eraus?

- Wat plangen déi Häre Ministeren ze maachen, fir den Transport vun dëse Schüler kuerzfristeg ze verbesseren a fir ze evitéieren, dass dës Schüler sech vun hiren Eltere mam Auto wäerte féieren respektiv ofhuele loossen, fir keng onnéideg Zäit mat Waarden ze verléieren?

Här President, ech bieden Iech, mäin déifste Respekt unzuhuelen.



Martine Hansen

Fraktiounspräsidentin

Gemeinsam Äntwert vum Här François Bausch, Minister fir Mobilitéit an ëffentlech Aarbechten, a vum Här Claude Meisch, Minister fir Educatioun, Kanner a Jugend, op d'parlamentaresch Fro n° 4205 vum 3. Mee 2021 vun der honorabeler Deputéiert Martine Hansen betreffend dem Transport vun de Schüler an de Lycée du Nord zu Wolz

Wéi déi honorabel Deputéiert Martine Hansen richteg an hirer parlamentarescher Fro festgestallt huet, sinn am Kader vun der Reorganisatioun vum regionale Busreseau RGTR den 9. Mee 2021 e puer deelweis negativ Auswierkungen op de Schoulwee vun de Jugenlechen an de Lycée du Nord zu Wolz entstan.

Am Kader vun der Reorganisatioun vum RGTR entsteet eng kloer Trennung tëscht dem Schoultransport an dem normalen Busreseau RGTR. Den Schoultransport ass och net méi am Horaire vum RGTR ausgewisen. Et gëtt eng speziell Offer fir den Schoultransport erstallt.

An dësem Fall hunn déi betreffend Servicer séier reagéiert an hunn duerch d'Avisen 2021/54, 2021/55, 2021/64 an 2021/65 déi néideg Mesurë geholl, fir dës Problemer ze behiewen.

Ganzer 4 nei Schoullinne sinn den 10. Mee 2021 agefouert ginn. Et handelt sech ëm folgend Schoullinnen:

- Linn 614: Rammerech – Harel – Wolz
- Linn 615: Bauschelt – Léifreg – Wolz
- Linn 639: Uewerwampech – Wanseler – Wolz
- Linn 643: Wolz – Wäicherdang – Klierf

Sollte weider Reklamatiounen erakommen oder Problemer festgestallt ginn, wäerten déi betreffend Servicer selbstverständlech sou séier wéi méiglech reagieren.